



Ardez: Butia ed atelier in d'üna

(anr/map) La glied d'Ardez ha tschüf il surnom da «bescha». Tenor l'inizianta dal proget da la butia da besch ad Ardez, Claudia Janett, es quai expressiun per glied chi's cuntegna illa cumünanza da maniera furbra. Uschè han agi eir las duonnas chi s'han unidas per realisar la butia in Bröl ingio cha la famiglia Mengiardi vaiva plü bod sia butia da colonials. «Il fat cha la lana dals 600 beschs d'Ardez chi vegnan tuondüts duos jadas l'on vain dovrada per material d'isolaziun e cha las cugnuschentschas da las lavuors manualas in connex culla lana van a perder m'ha dat andit da fundar quista butia», quinta Claudia Janett. Las duonnas interessadas vi dal proget han chattà il local ideal e til han muni culs prodots da lana da besch sco cuvertas, plümatschs, roba tessüda, fieutrada e fatta culs spaits, lana s-chartatschada e culurida, lana per far s-chagna, pels da besch ed oter plü. Claudia Janett agiundscha cha la butia nu vöglija be vender: «No lain eir demonstrar la lavur perquai vaina installà illa butia ün taler ed üna rouda da filar chi vegnan miss in fucncziun.» Implü vain eir fat s-chagna, fieutrà, cusì plümatschs ed i gnaran organisats cuors e dis da lavur. Cun quista nouva spüerta vöglian las ses collavuraturas e las ot agüdontas render il cumün plü attractiv e pisserar per ün guadogn parzial per duonnas indigenas. Ellas sun preschaintas in turnus illa butia, vendan e lavuran. Las uras d'avertiira da la butia da lügl fin october sun mardi fin sonda adiuna da las 14.00 a las 18.00 ed implü la sonda da las 10.00 a las 12.00. fotografia: Mario Pult